

I. DISPOSICIÓN XERAIS

MINISTERIO DE ECONOMÍA E COMPETITIVIDADE

8049 *Real decreto 669/2015, do 17 de xullo, polo que se desenvolve a Lei 4/2014, do 1 de abril, básica das cámaras oficiais de comercio, industria, servizos e navegación.*

ÍNDICE

Capítulo I. Disposicións xerais.

Artigo 1. Obxecto e ámbito de aplicación.

Capítulo II. Organización e funcionamento.

Artigo 2. Órganos de goberno.

Artigo 3. O pleno.

Artigo 4. O comité executivo.

Artigo 5. O presidente.

Artigo 6. Os vicepresidentes e o tesoureiro.

Artigo 7. O director xerente.

Artigo 8. O secretario xeral.

Artigo 9. Perda da condición de membro do pleno e do comité executivo.

Artigo 10. Procedemento para a perda da condición de membro.

Artigo 11. Causas de cesamento do presidente e dos cargos do comité executivo.

Artigo 12. Réxime de reunións e convocatorias.

Artigo 13. Funcións do pleno.

Artigo 14. Funcións do comité executivo.

Artigo 15. Regulamento de réxime interior e código de boas prácticas.

Capítulo III. Réxime xurídico e económico das cámaras.

Artigo 16. Tutela.

Artigo 17. Réxime económico.

Artigo 18. Disposición e administración de bens patrimoniais.

Artigo 19. Resolucións e acordos impugnables

Artigo 20. Réxime orzamentario e contas anuais.

Capítulo IV. Réxime electoral.

Artigo 21. Electores.

Artigo 22. Censo electoral.

Artigo 23. Candidatos elixibles.

Artigo 24. Apertura do proceso electoral.

Artigo 25. Convocatoria de eleccións.

Artigo 26. Xuntas electorais.

Artigo 27. Candidaturas e proclamación.

Artigo 28. Voto por correo.

Artigo 29. Voto electrónico.

Artigo 30. Publicidade institucional.

Artigo 31. Garantías do proceso.

Artigo 32. Órganos en funcións.

Artigo 33. Constitución dos órganos.

Artigo 34. Provisión en caso de vacantes sobrevidas no pleno.

Artigo 35. Elección en caso de vacantes no comité executivo.

Capítulo V. Extinción das cámaras.

Artigo 36. Extinción das cámaras.

Disposición adicional primeira. Réxime de protocolo.
Disposición adicional segunda. Tutela en materia de comercio exterior.
Disposición transitoria única. Designación de vogais do pleno.
Disposición derogatoria única. Derrogación normativa.
Disposición derradeira primeira. Título competencial.
Disposición derradeira segunda. Adaptación ao contido da norma.
Disposición derradeira terceira. Entrada en vigor.

O réxime básico de funcionamento das cámaras oficiais de comercio, industria, servizos e navegación (en diante, «cámaras») encóntrase recollido na Lei 4/2014, do 1 de abril, básica das cámaras oficiais de comercio, industria, servizos e navegación.

Con carácter previo á aprobación da citada lei, as cámaras regulábanse pola Lei 3/1993, do 22 de marzo, básica das cámaras de comercio, industria e navegación, e cun réxime xurídico moi detallado dentro do cal destacaba o Regulamento xeral das cámaras de comercio, industria e navegación, aprobado polo Decreto 1291/1974, do 2 de maio de 1974, previo á vixente Constitución española, que foi parcialmente derogado e modificado por sucesivas disposicións normativas, como foron o Real decreto 753/1978, do 27 de marzo, polo que se modifica o Regulamento xeral das cámaras oficiais de comercio, industria e navegación de España; o Real decreto 816/1990, do 22 de xuño, polo que se modifica o capítulo III do Regulamento xeral das cámaras oficiais de comercio, industria e navegación de España, que regula o sistema electoral destas corporacións, e o Real decreto 1133/2007, do 31 de agosto, polo que se modifica o capítulo III do Regulamento xeral de cámaras oficiais de comercio, industria e navegación, que regula o sistema electoral, ademais de pola citada lei, ben que a súa vixencia se mantén na actualidade, de conformidade co número 2 da disposición derogatoria da referida Lei 4/2014, do 1 de abril. Por outra parte, en exercicio das súas competencias en materia de comercio interior e de cámaras de comercio, as distintas comunidades autónomas viñeron desenvolvendo unha actividade normativa importante aplicable a cada un dos territorios.

Con este novo real decreto preténdese eliminar a dispersión normativa existente no ámbito regulamentario relativo ás cámaras prestando especial atención á regulación do réxime electoral, previsto no capítulo III da Lei 4/2014, do 1 de abril. O contido deste real decreto resulta de aplicación directa ás cámaras oficiais de comercio, industria, servizos e navegación das cidades de Ceuta e de Melilla sobre as cales a Administración xeral do Estado ten as competencias de tutela administrativa.

Este real decreto dítase de conformidade co previsto na disposición derradeira segunda da Lei 4/2014, do 1 de abril.

O real decreto consta dun total de 36 artigos, que se estruturan en cinco capítulos, dúas disposicións adicionais, unha disposición transitoria, unha disposición derogatoria e tres disposicións derradeiras.

O capítulo I recolle as disposicións xerais que regulan o obxecto e o ámbito de aplicación. Por outro lado, o capítulo II refírese á organización e funcionamento das cámaras. O capítulo III prevé o seu réxime xurídico e económico. O capítulo IV regula todo o relativo ao procedemento electoral. Finalmente, o capítulo V refírese á extinción das cámaras.

Respecto á parte final da norma, a disposición adicional primeira prevé o réxime de protocolo do presidente da Cámara Oficial de Comercio, Industria, Servizos e Navegación de España e a disposición adicional segunda regula a tutela en materia de comercio exterior. A disposición transitoria única establece o réxime que se debe aplicar para a designación das empresas de maior achega voluntaria. Mediante a disposición derogatoria única derrógase o Decreto 1291/1974, do 2 de maio, polo que se aproba o Regulamento xeral das cámaras oficiais de comercio, industria e navegación de España.

A disposición derradeira primeira recolle o título competencial habilitante e establece os artigos que se consideran de aplicación xeral. A disposición derradeira segunda establece a obrigaón de adaptar ao contido desta norma os regulamentos de réxime interior das cámaras oficiais de comercio, industria, servizos e navegación de Ceuta e de Melilla. A disposición derradeira terceira recolle a entrada en vigor.

Durante o proceso da súa tramitación, o real decreto foi sometido a consulta das administracións públicas implicadas e dos interlocutores económicos e sociais.

Na súa virtude, por proposta do ministro de Economía e Competitividade, coa aprobación previa do ministro de Facenda e Administracións Públicas, de acordo co Consello de Estado e logo de deliberación do Consello de Ministros na súa reunión do día 17 de xullo de 2015,

DISPOÑO:

CAPÍTULO I

Disposicións xerais

Artigo 1. *Obxecto e ámbito de aplicación.*

1. Este real decreto ten por obxecto o desenvolvemento da Lei 4/2014, do 1 de abril, básica das cámaras oficiais de comercio, industria, servizos e navegación, fundamentalmente no que se refire aos aspectos organizativos, electorais, de réxime xurídico e económico e do alcance da tutela.

2. O disposto neste real decreto é de aplicación ás cámaras oficiais de comercio, industria, servizos e navegación de Ceuta e de Melilla, cuxa tutela corresponde á Administración xeral do Estado.

Sen prexuízo do indicado no parágrafo anterior, serán de aplicación xeral por todas as administracións públicas os artigos 22.3 e 4, 28.3 e 29 e as disposicións adicionais primeira e segunda.

CAPÍTULO II

Organización e funcionamento

Artigo 2. *Órganos de goberno.*

1. Son órganos de goberno das cámaras:

- a) O pleno.
- b) O comité executivo.
- c) O presidente.

2. O regulamento de réxime interior de cada unha das cámaras determinará, entre outros aspectos, a estrutura do pleno, as súas funcións, o número e forma de elección dos membros do comité executivo e as normas de funcionamento dos seus órganos de goberno, con suxeición aos criterios básicos establecidos na Lei 4/2014, do 1 de abril, e a este real decreto.

Artigo 3. *O pleno.*

1. O pleno é o órgano supremo de goberno e representación das cámaras.

2. O número total de vogais e a súa distribución por grupos e categorías establecerase no regulamento de réxime interior e estará comprendido entre 12 e 18:

a) De acordo co establecido no artigo 10.2.a) e 10.5 da Lei 4/2014, do 1 de abril, dous terzos dos vogais do pleno (entre 8 e 12 vogais) serán os representantes de todas as empresas pertencentes ás cámaras.

b) Conforme o disposto no artigo 10.2.b) da Lei 4/2014, do 1 de abril, os representantes das empresas e persoas de recoñecido prestixio na vida económica dentro da circunscrición de cada cámara, por proposta das organizacións empresariais, estarán comprendidos entre 1 e 5 vogais.

Para estes efectos, as organizacións empresariais que, sendo intersectoriais e territoriais ao mesmo tempo, teñan a condición legal de máis representativas conforme a disposición adicional sexta do texto refundido da Lei do Estatuto dos traballadores, aprobado polo Real decreto legislativo 1/1995, do 24 de marzo, presentarán a lista de empresas e persoas de recoñecido prestixio para cubrir as ditas vogalías no número correspondente.

c) De conformidade co artigo 10.2.c) da Lei 4/2014, do 1 de abril, os representantes das empresas de maior achega voluntaria na demarcación de cada cámara serán, así mesmo, entre 1 e 5 vogais.

3. Poderán asistir ás reunións do pleno, con voz pero sen voto, de acordo co establecido no artigo 10.3 da Lei 4/2014, do 1 de abril, persoas de recoñecido prestixio, cuxo número se determinará no regulamento de réxime interior, procedentes dunha lista de candidatos proposta polo presidente aos vogais.

4. En defecto de regulación polos regulamentos de réxime interior, o número total de vogais será de 13, determinados do seguinte modo:

a) Os vogais elixidos por sufraxio, previstos no artigo 10.2.a) da Lei 4/2014, do 1 de abril, serán 9 distribuídos por grupos e categorías en función da representatividade dos distintos sectores económicos que se determinará tendo en consideración a súa achega ao produto interior bruto (PIB), o número de empresas e o emprego correspondentes á demarcación territorial de cada cámara.

b) Os representantes das empresas e persoas de recoñecido prestixio previstos no artigo 10.2.b) da Lei 4/2014, do 1 de abril, serán 2.

c) Os representantes das empresas de maior achega voluntaria, previstos no artigo 10.2.c) da Lei 4/2014, do 1 de abril, serán 2.

d) As persoas de recoñecido prestixio que poderán asistir ás reunións do pleno, con voz pero sen voto, sen ter a condición de vogais, previstas no artigo 10.3 da Lei 4/2014, do 1 de abril, serán 3 procedentes dunha lista de candidatos proposta polo presidente aos vogais.

5. O mandato dos vogais do pleno será de catro anos. Poderán ser reelixidos e a súa condición de membros do pleno é indelegable.

6. Para a elección dos membros do pleno representantes das empresas de maior achega voluntaria á cámara, que se prevén no artigo 10.2.c) da Lei 4/2014, do 1 de abril, terase en conta a achega voluntaria satisfeita nos termos que estableza o regulamento de réxime interior. En defecto de regulamento de réxime interior, o comité executivo establecerá os termos para a designación destes membros do pleno.

Esta achega deberase efectuar en cada exercicio orzamentario e será obxecto de actualización con carácter anual, sen prexuízo da existencia doutro tipo de achegas distintas que poidan realizar outras empresas que non sexan membros do pleno.

7. A estrutura e composición do pleno, en canto ao número de vogais e á súa distribución por sectores económicos en grupos e categorías, revisaranse e actualizaranse cada catro anos, tendo en conta as variacións producidas na achega ao PIB, o número de empresas e o emprego correspondentes á demarcación territorial de cada cámara, segundo o establecido no artigo 10.2 da Lei 4/2014, do 1 de abril, o que se deberá recoller no correspondente regulamento de réxime interior, que deberá ser aprobado pola Administración tutelante. Entenderanse por grupos as diferentes modalidades de actividade do comercio, da industria, dos servizos e da navegación, e por categorías a súa subdivisión en función dos distintos ámbitos da súa actividade, de acordo coa súa representatividade, na forma en que se determine nos respectivos regulamentos de réxime interior de cada cámara.

Artigo 4. *O comité executivo.*

1. O comité executivo é o órgano permanente de xestión, administración e proposta da cámara, e os seus membros serán elixidos polo pleno entre os seus vogais.

2. O comité executivo estará composto polo presidente, que será o da cámara, os vicepresidentes ou vicepresidente, o tesoureiro e o número de vogais que determine o regulamento de réxime interior, que será, como máximo, de 8 para as cámaras tuteladas pola Administración xeral do Estado.

3. O mandato dos cargos do comité executivo será de catro anos e coincidirá co dos vogais do pleno. Poderán ser reelixidos e a súa condición é indelegable.

4. A Administración tutelante poderá designar un representante, que deberá ser necesariamente convocado ás reunións do comité executivo. No caso da Cámara da cidade de Melilla, o representante pertencerá á Delegación de Economía e Facenda e, no caso da Cámara da cidade de Ceuta, á Dirección Provincial de Comercio.

Artigo 5. *O presidente.*

1. O presidente desempeñará a representación da cámara, a presidencia de todos os seus órganos colexiados, será responsable da execución dos seus acordos e responderá da súa xestión ante o pleno. As súas funcións determinaranse no regulamento de réxime interior.

2. Será elixido polo pleno entre os seus membros por maioría na forma que se determine no regulamento de réxime interior.

3. Nas decisións que sexan sometidas a votación no comité executivo e no pleno, o presidente terá voto de calidade.

4. O presidente, sen prexuízo da súa responsabilidade persoal, poderá delegar por escrito facultades concretas e determinadas nos vicepresidentes e, no seu defecto, en calquera das persoas que forman parte do comité executivo, e dará conta disto ao pleno. Cando se trate de facultades executivas, poderá efectuar a dita delegación no secretario xeral ou no director xerente, se o houber, na forma expresada.

Artigo 6. *Os vicepresidentes e o tesoureiro.*

1. O vicepresidente ou vicepresidentes, pola súa orde, substituirán o presidente en todas as súas funcións nos supostos de ausencia, enfermidade ou vacante.

2. O tesoureiro custodiará os fondos da cámara na forma que se dispoña no regulamento de réxime interior, supervisará a contabilidade e dirixirá a preparación das contas anuais.

Artigo 7. *O director xerente.*

1. As cámaras poderán nomear un director xerente, que deberá ser licenciado ou titulado de grao superior e cuxo nomeamento e cesamento corresponderán ao pleno, por proposta do presidente e por acordo motivado adoptado pola metade máis un dos seus membros.

2. Corresponde ao director xerente, con independencia das facultades executivas que nel puidesen ser delegadas polos órganos de goberno, a xestión dos acordos adoptados polos órganos de goberno da cámara e a dirección dos seus servizos, nos termos que estableza o presidente.

Asistirá, con voz pero sen voto, ás sesións dos órganos de goberno da cámara e manterá informados da súa xestión e do conxunto de actividades da cámara o pleno, o comité executivo e o presidente. Cando non exista director xerente ou este non poida realizar as súas funcións, estas serán asumidas polo secretario xeral.

Este posto estará sometido ao réxime de contratación laboral.

Artigo 8. *O secretario xeral.*

1. As cámaras terán un secretario xeral, que deberá ser licenciado ou titulado de grao superior. O secretario xeral estará sometido ao réxime de contratación laboral.

O seu nomeamento e cesamento corresponderán ao pleno da cámara por acordo motivado adoptado pola metade máis un dos seus membros. O nomeamento terá lugar logo de convocatoria pública da praza realizada polo comité executivo por medio da inserción do correspondente anuncio na páxina web das cámaras e nun dos diarios de maior tiraxe na súa demarcación.

O secretario xeral serao do pleno e do comité executivo.

O secretario xeral, con voz pero sen voto, asistirá como tal ás reunións dos órganos de goberno da cámara e velará pola legalidade dos seus acordos. Así mesmo, efectuará, cando proceda, as pertinentes advertencias sobre eles para a boa marcha da cámara e deixará constancia disto nas correspondentes actas.

2. Ademais das funcións establecidas no número anterior, corresponde ao secretario xeral, con independencia das facultades que nel puidesen ser delegadas, redactar e asinar co presidente as actas das reunións dos órganos de goberno, así como a custodia dos libros das actas; certificar, cando sexa preciso, os acordos dos órganos de goberno e demais certificacións requiridas ás cámaras; prestar a asistencia e os asesoramentos precisos ao pleno, ao comité executivo, ao presidente e ao director xerente e, en xeral, cantas outras funcións sexan inherentes á súa condición de secretario. Cando, por calquera motivo, non exista secretario xeral ou este non poida desempeñar as súas funcións, estas serán asumidas pola persoa que designe o comité executivo.

Artigo 9. *Perda da condición de membro do pleno e do comité executivo.*

O pleno acordará a perda da condición de membro deste nos casos seguintes:

a) Cando por circunstancias sobrevidas deixe de concorrer algún dos requisitos necesarios para ser elixido.

b) No suposto de empresas que formen parte do pleno por ser as de maior achega voluntaria, as que deixen de realizar esta conforme o disposto no regulamento de réxime interior.

c) Por non ter tomado posesión dentro do prazo fixado no regulamento de réxime interior.

d) Por falta de asistencia inustificada ás sesións do pleno durante dúas veces ou catro ás do comité executivo, no curso dun ano natural.

e) Por renuncia ou por calquera causa que o incapacite para o desempeño do cargo.

f) Por ser inhabilitado para emprego ou cargo público.

g) Por incumprimento grave do código de boas prácticas logo de audiencia do interesado.

h) Por falecemento no caso de persoas físicas ou extinción no caso das persoas xurídicas.

Artigo 10. *Procedemento para a perda da condición de membro.*

1. O acordo do pleno será adoptado logo de audiencia do interesado e, se for o caso, da empresa en cuxa representación actúe. Contra este acordo poderase interpor recurso administrativo ante o órgano competente da Administración tutelante.

2. A elección para cubrir a vacante producida farase segundo o que establece o artigo 34 deste real decreto e non se producirá até que o órgano competente da Administración resolva o recurso, se o houber.

Artigo 11. *Causas de cesamento do presidente e dos cargos do comité executivo.*

1. Con independencia da terminación normal dos seus mandatos, o presidente e os cargos do comité executivo poderán cesar:

a) Polas causas previstas neste real decreto para a perda da condición de membro do pleno previstas no artigo 9.

b) Por acordo do pleno adoptado polas dúas terceiras partes dos seus membros.

c) Por renuncia que non implique a perda da súa condición de vogal do pleno.

2. A vacante cubrirá o pleno en sesión convocada para o efecto dentro dos quince días seguintes ao de se producir aquela, conforme establece o artigo 33.

3. A persoa elixida ocupará o cargo polo tempo que falte para cumprir o mandato daquel a quen suceda.

Artigo 12. *Réxime de reunións e convocatorias.*

1. O regulamento do réxime interior determinará o quórum mínimo de asistencia e de votación para as sesións dos órganos de goberno. Se non se establece previsión ningunha, entenderase que o pleno queda constituído e toma acordos validamente se concorren os seguintes requisitos:

a) En primeira convocatoria, que asistan, ao menos, dous terzos dos seus membros e os acordos se adopten por maioría simple dos asistentes.

b) En segunda convocatoria, que asistan, ao menos, a metade máis un dos seus membros e que os acordos sexan adoptados por dúas terceiras partes dos asistentes. Se tras a convocatoria do pleno en segunda convocatoria se incorporan ao menos dous terzos dos seus membros, aplicaranse as normas da primeira convocatoria e, en consecuencia, os acordos adoptaranse por maioría simple.

2. Para que o comité executivo poida celebrar validamente as sesións deben asistir, ao menos, a metade máis un dos seus membros e os seus acordos débense adoptar por maioría dos asistentes.

3. O pleno reunirase dúas veces ao ano, como mínimo, e o comité executivo, como mínimo, seis veces ao ano. En todo caso será necesaria a asistencia do presidente e do secretario para a válida constitución do pleno ou do comité executivo, sen prexuízo das normas aplicables para a súa substitución nos casos de vacante, ausencia ou enfermidade que se preveña no regulamento de réxime interior.

4. As reunións do pleno e do comité executivo serán convocadas polo presidente ou cando o solicite máis da cuarta parte dos seus membros. En todo caso, a convocatoria irá acompañada da súa correspondente orde do día.

5. O representante que, de ser o caso, designe a Administración xeral do Estado de conformidade co artigo 11 da Lei 4/2014, do 1 de abril, será convocado ás reunións do comité executivo, ás cales asistirá con voz pero sen voto.

Artigo 13. *Funcións do pleno.*

As funcións que corresponden ao pleno serán reguladas polo regulamento de réxime interior das cámaras, que, como mínimo, incluírá as seguintes:

a) A aprobación dos programas anuais de actuación e xestión corporativa relacionados co exercicio das funcións de carácter público-administrativo.

b) A adopción de acordos relativos á interposición de toda clase de recursos e accións ante calquera xurisdición.

c) A adopción de acordos relativos á participación da cámara en toda clase de asociacións, fundacións, sociedades civís ou mercantís, así como a realización de todo tipo de convenios de colaboración.

d) A adopción de acordos referentes á adquisición e disposición de bens. Para importes inferiores ao 25 por cento do activo fixo da cámara poderá delegar esta facultade no comité executivo, sen prexuízo do indicado no artigo 18 deste real decreto.

e) A constitución de calquera clase de préstamos e avais, así como de garantías que afecten os bens da cámara.

- f) O nomeamento e cesamento do secretario xeral e, se for o caso, do director xerente.
- g) A proposta de aprobación e modificación do regulamento de réxime interior e a elaboración do código de boas prácticas a que se refire o artigo 16 da Lei 4/2014, do 1 de abril.
- h) A aprobación do censo electoral.
- i) A elección e cesamento do presidente e membros do comité executivo, e a declaración e provisión de vacantes, todo isto de acordo co previsto neste real decreto.
- j) O nomeamento e o cesamento das persoas de recoñecido prestixio previstas no artigo 10.3 da Lei 4/2014, do 1 de abril, nos termos establecidos no regulamento de réxime interior.
- k) A aprobación de orzamentos, as contas anuais e as súas liquidacións.
- l) A aprobación do informe anual de goberno corporativo a que se refire o artigo 35.1 da Lei 4/2014, do 1 de abril.
- m) Cantas atribucións non estean expresamente encomendadas a outros órganos da cámara.

Artigo 14. *Funcións do comité executivo.*

As funcións que corresponden ao comité executivo serán reguladas polo regulamento de réxime interior das cámaras, que, como mínimo, incluírá as seguintes:

- a) Realizar e dirixir as actividades da cámara necesarias para o exercicio e desenvolvemento das funcións público-administrativas.
- b) Propor ao pleno os programas anuais de actuación e xestión corporativa, realizar e dirixir os xa aprobados e dar conta a aquel do seu cumprimento.
- c) Propor ao pleno o exercicio de accións e a interposición de recursos ante calquera xurisdición.
- d) Propor ao pleno a adquisición e disposición de bens, salvo que conte cunha delegación daquel para o efecto.
- e) Confeccionar e propor ao pleno a aprobación de toda clase de orzamentos, as contas anuais e as súas liquidacións.
- f) Elaborar o informe anual de goberno corporativo a que se refire o artigo 35.1 da Lei 4/2014, do 1 de abril. Realizar ou ordenar a realización de informes e estudos relacionados cos fins da cámara.
- g) Inspeccionar e velar polo normal funcionamento dos servizos da cámara.
- h) Propor ao pleno a modificación total ou parcial do regulamento de réxime interior e do código de boas prácticas.
- i) En casos de urxencia, adoptar decisións sobre competencias que corresponden ao pleno e dar conta a este na primeira sesión que se celebre.

Artigo 15. *Regulamento de réxime interior e código de boas prácticas.*

1. As cámaras rexeranse polo seu propio regulamento de réxime interior cuxa aprobación, así como a das súas modificacións, corresponden á Administración tutelante, por proposta do pleno daquelas. Considerarase aprobado se, transcorrido o prazo de tres meses desde a presentación no rexistro do órgano competente para resolver, esta non formulase obxeccións na súa contra. A Administración tutelante poderá, de maneira motivada e expresa, denegar a aprobación definitiva do regulamento ou propor a súa modificación parcial, e instar a cámara para que presente un novo proxecto de regulamento no prazo dun mes desde o día seguinte á notificación.

2. A Administración tutelante deberá promover a modificación do regulamento de réxime interior por instancia motivada do 25 por cento dos electores da cámara e elevar a dita iniciativa ao pleno da cámara.

3. No regulamento de réxime interior constarán, entre outros aspectos, a estrutura do seu pleno, as súas funcións e as do comité executivo, así como o número e forma de

elección dos membros do dito comité executivo, os prazos de toma de posesión e, en xeral, as normas de funcionamento dos seus órganos de goberno, así como a concreción dos grupos e, se for o caso, as categorías que se van establecer dentro do censo conforme os criterios fixados pola Lei 4/2014, do 1 de abril, e pola Administración tutelante, todo isto de acordo co previsto na citada lei, así como neste real decreto.

4. Así mesmo, e de acordo co establecido no artigo 16.3 da Lei 4/2014, do 1 de abril, as cámaras deberán elaborar un código de boas prácticas que garanta a imparcialidade e transparencia no desenvolvemento das funcións público-administrativas das cámaras oficiais de comercio, industria, servizos e navegación, o cal será de aplicación a todos os membros da cámara, ao seu persoal, así como nas súas relacións con terceiros.

CAPÍTULO III

Réxime xurídico e económico das cámaras

Artigo 16. *Tutela.*

1. A Administración tutelante exercerá as potestades administrativas de aprobación, fiscalización, resolución de recursos, suspensión e disolución, segundo o establecido no artigo 34 da Lei 4/2014, do 1 de abril.

As relacións laborais co persoal das cámaras quedan fóra da tutela por parte da Administración e están suxeitas ao ámbito da xestión das cámaras.

2. No caso previsto no artigo 35.1 da Lei 4/2014, do 1 de abril, relativo á aprobación dos orzamentos da cámara e á fiscalización das súas contas anuais, a función de tutela suporá exclusivamente as seguintes actuacións:

a) A comprobación de que os orzamentos e as contas anuais foron aprobados polos órganos das cámaras de acordo coas maiorías exixibles e no estrito cumprimento das súas competencias. Para a súa acreditación, achegará a certificación do correspondente acordo quen teña a potestade certificante dos acordos das cámaras e un informe justificativo das circunstancias sometidas á tutela da Administración.

b) A verificación de que os orzamentos cumpren co principio de equilibrio orzamentario e contención, se for o caso, do déficit.

c) A supervisión das contas anuais atendendo ao disposto no informe de auditoría e á realización, se for o caso, das observacións que procedan.

3. No caso previsto no artigo 37.3 e 4 da Lei 4/2014, do 1 de abril, correspondente á disolución dos órganos de goberno e, se for o caso, á extinción das cámaras, a función de tutela unicamente comprenderá a aprobación da liquidación realizada polo órgano de xestión e a garantía de prestación de servizos propios das cámaras sen que a Administración tutelante quede directa ou indirectamente vinculada polos saldos debedores derivados da liquidación, dos cales responderá exclusivamente o patrimonio da cámara extinguida.

Cando, de conformidade co artigo 37.3 da Lei 4/2014, do 1 de abril, corresponda a realización da liquidación ao órgano de xestión, este realizará a correspondente proposta, que deberá ir acompañada do inventario patrimonial e do balance. A proposta de liquidación deberá ser remitida á Administración tutelante polo órgano de xestión, co visto e prace do seu presidente. Tanto a proposta como o inventario e o balance deberán ser obxecto de auditoría con carácter previo á súa aprobación polo órgano de xestión.

4. No suposto previsto no artigo 5.4 da Lei 4/2014, do 1 de abril, conforme o cal é necesaria a autorización da Administración tutelante para que as cámaras poidan promover ou participar en toda clase de asociacións, fundacións e sociedades civís ou mercantís, así como celebrar os oportunos convenios de colaboración:

a) A Administración tutelante resolverá a solicitude de participación en entidades no prazo dun mes contado desde o día seguinte á súa recepción. Transcorrido este prazo sen que se resolverse, a solicitude entenderase estimada.

b) Cando se formule unha solicitude para a celebración de convenios de colaboración, o prazo para resolver será de dez días hábiles contados desde o día seguinte á súa recepción. Transcorrido o dito prazo, entenderase estimada a solicitude.

5. As cámaras elaborarán un informe semestral para o seguimento das actuacións de participación en entidades e de celebración de convenios.

6. En ambos os casos, a función de tutela suporá exclusivamente apreciar que os órganos da cámara adoptasen o correspondente acordo de conformidade coas maiorías exixidas e no estricto cumprimento das súas competencias.

Para os efectos da acreditación dos anteriores aspectos ante a Administración de tutela, deberán achegarse a certificación do correspondente acordo, expedida por quen teña a potestade certificante dos acordos das cámaras, e un informe xustificativo das circunstancias sometidas á tutela da Administración.

Artigo 17. *Réxime económico.*

As cámaras disporán dos ingresos a que fai referencia o artigo 19 da Lei 4/2014, do 1 de abril. Para estes efectos, entenderanse por achegas voluntarias as contribucións en diñeiro entregadas ás cámaras para o cumprimento dos seus fins sen contraprestación. Tamén se entenderá por achega a entrega sen contraprestación de bens ou dereitos susceptibles de valoración económica que necesariamente deberán ser previamente aceptados pola cámara en atención á súa utilidade ao obxecto da súa actividade.

Artigo 18. *Disposición e administración de bens patrimoniais.*

1. As cámaras deberán contar coa autorización da Administración tutelante para a disposición de bens inmoables, e deberán obtela con carácter previo ao inicio do procedemento de alleamento, que se baseará nos principios de publicidade, transparencia e non discriminación. Ao solicitar a autorización definirase a motivación e a finalidade á cal van ir destinados os fondos que se obteñan.

2. No caso da adquisición de bens inmoables tamén será necesaria a autorización previa da Administración tutelante, á cal se deberá informar da forma e prazo en que se vaia financiar a dita adquisición para garantir a dispoñibilidade de recursos que permita facer fronte a ela.

3. Encontraranse igualmente sometidos a autorización previa os actos de administración do patrimonio inmobiliario que teñan un importe igual ou superior ao 25 por cento do valor do inmoable afectado. Ao solicitar a autorización, definiranse a motivación e a finalidade da actuación que se pretenda levar a cabo para a correcta administración patrimonial.

4. No caso do resto de bens, non inmoables, tamén será necesaria a dita autorización con carácter previo cando o valor do ben ou a operación de crédito para calquera fin que se queira celebrar exceda o 25 por cento do orzamento ordinario.

5. A Administración tutelante resolverá a solicitude no prazo dun mes. Transcorrido este prazo sen que resolverse a solicitude, entenderase estimada.

Artigo 19. *Resolucións e acordos impugnables.*

1. As resolucións e os acordos dos órganos de goberno no exercicio das funcións público-administrativas das cámaras son impugnables mediante recurso administrativo, no prazo dun mes desde a súa adopción, ante a Administración tutelante, cuxa resolución, para os efectos do recurso contencioso-administrativo, porá fin á vía administrativa.

Os indicados recursos regularanse polo disposto na Lei 30/1992, do 26 de novembro, de réxime xurídico das administracións públicas e do procedemento administrativo común.

2. As resolucións en materia electoral serán impugnables ante a Administración tutelante, de conformidade co disposto nos artigos 24.3, 26.7 e 31.13.

Artigo 20. *Réxime orzamentario e contas anuais.*

1. As cámaras deben elaborar, anualmente, orzamentos ordinarios de ingresos e gastos e, se procede, extraordinarios.

2. Así mesmo, as cámaras deberán someter os orzamentos ordinarios e extraordinarios á aprobación da Administración tutelante, que tamén deberá fiscalizar as súas contas anuais e liquidacións, de acordo co previsto no artigo 35.1 da Lei 4/2014, do 1 de abril, e 16 deste regulamento. As contas anuais elaboraranse aplicando os principios e normas de contabilidade recollidos no Código de comercio e o plan de contabilidade das entidades sen fins lucrativos. As mencionadas contas anuais e liquidacións deberán ser presentadas polo comité executivo para a súa aprobación polo pleno acompañadas polo correspondente informe de auditoría externa.

3. Os plenos das cámaras, sobre a base da proposta elaborada polo comité executivo, aprobarán o proxecto de orzamento ordinario para o ano seguinte, antes do 1 de novembro, e a liquidación das contas do exercicio precedente antes do 1 de abril, e elevaranos, dentro do prazo máximo de tres días posteriores á súa aprobación polo pleno das cámaras, á Administración tutelante para a súa aprobación, a cal deberá negala cando vulneren os preceptos da Lei 4/2014, do 1 de abril. A aprobación dos orzamentos entenderase feita se, antes do 30 de decembro, a Administración tutelante non fixo observación ningunha e, no caso das contas, antes do 30 de xuño.

Para a realización de obras e servizos non previstos no orzamento ordinario, deberán formalizarse orzamentos extraordinarios. Os seus proxectos, unha vez aprobados polo pleno, someteranse á aprobación da Administración tutelante e entenderanse aprobados se non hai oposición por parte desta no prazo dun mes desde a súa presentación.

As obras imprevistas e de carácter urxente que non admitan demora na súa execución poderanse acometer sen necesidade de orzamentos extraordinarios e darase traslado inmediato do seu custo e da xustificación motivada da necesidade da súa realización urxente á Administración tutelante. Neste caso, será necesaria a inmediata adopción dun acordo por parte do comité executivo en que se xustifique, de maneira suficiente e razoable, a urxente necesidade da actuación, se ordene o inicio da formalización do orzamento e do expediente de contratación correspondente, dando conta ao pleno na primeira sesión que se celebre.

4. As contas anuais das cámaras, xunto co informe de auditoría e o informe anual sobre o goberno corporativo, depositaranse no rexistro mercantil correspondente ás súas localidades e serán obxecto de publicidade na páxina web da correspondente cámara.

5. De acordo co establecido no artigo 35.3 da Lei 4/2014, do 1 de abril, as cámaras farán públicas na súa páxina web as subvencións que reciban, así como calquera outro tipo de recursos públicos que poidan recibir para o desenvolvemento das súas funcións. Para efectos de dar publicidade ás retribucións anuais, considérase que son altos cargos e máximos responsables das cámaras o presidente, o secretario xeral e o director xerente, se o houber.

6. As cámaras deberán adecuar a súa contabilidade ao establecido no artigo 35.4 da Lei 4/2014, do 1 de abril, diferenciando entre as actividades públicas e privadas.

CAPÍTULO IV

Réxime electoral

Artigo 21. *Electores.*

1. Terán a condición de electores nas respectivas cámaras oficiais de comercio, industria, servizos e navegación as persoas físicas ou xurídicas, nacionais ou estranxeiras, que realicen actividades comerciais, industriais, de servizos ou navieiras en territorio nacional e que figuren inscritas no último censo electoral aprobado pola cámara, de acordo co establecido no artigo 17.1 da Lei 4/2014, do 1 de abril, e co seu respectivo regulamento

de réxime interior, sempre que non se encontren inhabilitadas conforme o previsto no artigo 9.3 da Lei 4/2014, do 1 de abril.

Os electores estranxeiros deberán encontrarse en situación de residencia, de conformidade co previsto na Lei orgánica 4/2000, do 11 de xaneiro, sobre dereitos e liberdades dos estranxeiros en España e a súa integración social, e na súa normativa de desenvolvemento.

2. Consideraranse actividades incluídas as definidas no artigo 7.3 da Lei 4/2014, do 1 de abril.

3. Entenderase que unha persoa física ou xurídica exerce unha actividade comercial, industrial, de servizos ou naveira cando por esta razón quede suxeita ao imposto sobre actividades económicas ou tributo que o substitúa no territorio correspondente do ámbito da cámara.

4. As persoas físicas exercerán o seu dereito electoral activo persoalmente. As persoas xurídicas exercerán o seu dereito electoral activo mediante representante con poder suficiente, de carácter xeral ou específico para a votación.

5. As persoas físicas ou xurídicas que teñan establecementos, delegacións ou axencias en circunscricións correspondentes á demarcación de varias cámaras terán a condición de electores en cada unha delas. A mesma regra se aplicará ás empresas que teñan o seu domicilio social na demarcación dunha cámara e desenvolvan as súas actividades na doutra ou noutras.

6. Para ser elector en nome propio ou en representación de persoas xurídicas, requirirase a maioría de idade e non estar incurso en ningunha causa legal que impida a dita condición.

Artigo 22. *Censo electoral.*

1. O censo electoral das cámaras comprenderá a totalidade dos seus electores, clasificados por grupos e categorías, en atención á importancia económica relativa dos diversos sectores representados, na forma que determine a respectiva Administración tutelante. Esta clasificación revisarase cada catro anos o comité executivo.

2. O censo formarase e revisarase anualmente o comité executivo, con referencia ao 1 de xaneiro.

3. A Axencia Estatal de Administración Tributaria, así como as outras administracións territoriais competentes en materia tributaria, colaborarán cos órganos de goberno das cámaras para proporcionarles a información necesaria para a elaboración e constitución dos censos, garantindo que só terán acceso á dita información os empregados de cada cámara que determine o pleno co obrigatorio deber de sigilo respecto dos ditos datos. Para tal efecto, a Axencia Estatal de Administración Tributaria subministrará a información que se desprenda do censo do imposto sobre actividades económicas xunto cos datos das empresas que sexan necesarios e que consten noutros censos que esta elabora e xestiona, en particular o Censo de empresarios, profesionais e retedores.

4. Para efectos electorais e coas garantías derivadas do réxime legal de protección de datos de carácter persoal previsto na Lei orgánica 15/1999, do 13 de decembro, e demais normativa aplicable, a Administración tutelante poderá solicitar dos órganos de goberno das cámaras a información contida no censo electoral que sexa necesaria para o correcto exercicio das competencias que, en materia electoral, ten atribuídas a dita Administración tutelante.

Artigo 23. *Candidatos elixibles.*

1. Para ser elixible como membro do pleno por sufraxio deberanse reunir os seguintes requisitos:

a) Ter a nacionalidade española ou dun Estado membro da Unión Europea, a dun Estado parte no Acordo sobre o Espazo Económico Europeo, a dun Estado a cuxos nacionais se estenda, en virtude do correspondente acordo ou tratado internacional, o

réxime xurídico previsto para os cidadáns anteriormente citados ou ben, en caso de ter unha nacionalidade distinta ás anteriores, poderase ser candidato de acordo co principio de reciprocidade.

- b) Formar parte do censo da cámara.
- c) Ser elector do grupo ou categoría correspondente.
- d) Ser maior de idade, se se trata dunha persoa física.
- e) Levar, como mínimo, dous anos de exercicio na actividade empresarial nos territorios citados na letra a). Esta circunstancia acreditarase mediante a alta no Censo de empresarios, profesionais ou retedores ou, se for o caso, acreditación equivalente para o exercicio da actividade nos demais supostos.
- f) Estar ao día no pagamento das súas obrigacións tributarias e coa Seguridade Social.
- g) Non ser empregado da cámara nin estar participando en obras ou concursos que aquela convocase, no momento de se presentar a candidatura ou de se celebrar eleccións.
- h) Non encontrarse inhabilitado por incapacidade, inelixibilidade ou incompatibilidade pola normativa vixente, nin acharse incurso nun proceso concursal cualificado de culpable, nin acharse cumprindo unha pena privativa de liberdade. Tampouco poderá acharse inhabilitado para o emprego ou cargo público.

2. A duración do mandato dos membros do pleno das cámaras será de catro anos e poderán ser reelixidos.

3. As persoas físicas ou xurídicas que exerzan actividades correspondentes a diversos grupos do censo dunha cámara terán dereito electoral activo e pasivo en cada un deles. Non obstante, se saen elixidas en máis dun grupo ou categoría, deberán renunciar dentro do prazo de tres días, desde a súa elección, aos postos de membros do pleno que excedan un. No caso de que non presenten renuncia no prazo indicado, terase por efectuada no grupo ou grupos ou categorías en que acreditasen menor antigüidade e, se esta for igual, o dereito electoral exercerase onde haxa menor número de representantes e considerarase automaticamente electo o seguinte candidato máis votado.

Artigo 24. *Apertura do proceso electoral.*

1. Tal e como establece o artigo 18 da Lei 4/2014, do 1 de abril, o Ministerio de Economía e Competitividade determinará a apertura do proceso electoral, logo de acordo coas comunidades autónomas que teñan atribuída competencia nesta materia, e á respectiva Administración tutelante corresponderalle a convocatoria de eleccións.

2. Dez días despois de aberto o proceso electoral, as cámaras deberán expor os seus censos, actualizados ao menos en data do 1 de xaneiro anterior, ao público no seu domicilio social, nas súas delegacións, na páxina principal da internet de cada cámara e naqueloutros lugares que consideren oportunos para a súa maior publicidade, durante o prazo de vinte días naturais. As reclamacións sobre a inclusión ou exclusión das empresas nos grupos e categorías correspondentes poderán presentarse desde o momento en que se inicie a exposición dos censos ao público até dez días despois do vencemento dos vinte días naturais sinalados anteriormente. A secretaría da cámara deberá dar un xustificante da presentación das reclamacións.

3. O comité executivo da cámara deberá resolver as reclamacións formuladas nun prazo de dez días, contados a partir da data de vencemento do período aberto para a presentación das ditas reclamacións. Se o comité executivo non resolve nese prazo entenderanse desestimadas. Contra os acordos do comité executivo poderase interpor, no prazo de dez días, un recurso administrativo ante a Administración tutelante, que se resolverá unha vez visto o informe do comité executivo. O prazo máximo para ditar e notificar a resolución será dun mes. A resolución do recurso citado esgotará a vía administrativa.

4. A presentación do citado recurso e a do eventual recurso contencioso-administrativo non suporán a suspensión do proceso electoral, a non ser que a Administración tutelante ou, no caso do recurso contencioso, o xuíz, considere, vistas as

circunstancias do caso, que a súa non suspensión pode supor un grave risco para o proceso.

5. A cámara deberá ter dispoñibles na súa páxina web de maneira destacada todos os modelos de documentos normalizados a que se refire o artigo 25.2.e), de maneira que poidan ser descargados facilmente polos electores e candidatos.

Artigo 25. *Convocatoria de eleccións.*

1. Transcorridos os prazos establecidos nos números 2 e, se for o caso, 3 do artigo 24, o órgano competente da Administración tutelante, logo de consulta ás cámaras do seu ámbito territorial, procederá a convocar as eleccións.

A convocatoria publicarase con trinta días naturais, como mínimo, de anticipación á data da elección, no «Boletín Oficial» da provincia ou no «diario oficial da comunidade autónoma», segundo proceda, e ao menos nun dos diarios de maior circulación dentro da circunscrición da cámara.

As cámaras darán publicidade á convocatoria nas súas sedes sociais e nas súas delegacións e polos medios de comunicación que consideren máis oportunos, así como na súa páxina da internet.

2. Na convocatoria farase constar:

a) O día e as horas en que cada grupo ou categoría debe emitir o voto para a elección dos seus representantes.

b) O número de colexios electorais e os lugares onde deban instalarse.

c) Os prazos para o exercicio do voto por correo.

d) As sedes das xuntas electorais.

e) A páxina web ou, se for o caso, outro medio onde estean dispoñibles os modelos normalizados de presentación de candidaturas, avais e os requisitos exixidos, modelos de solicitude de voto por correo e de sobres e papeletas de votación aprobados polo órgano administrativo tutelar e todos aqueles aspectos que se consideren necesarios para a homoxeneización e normalización do procedemento electoral.

3. As eleccións de cada grupo e categoría celebraranse nun só día e, cando se establezan varios colexios, simultaneamente en todos eles.

Artigo 26. *Xuntas electorais.*

1. No prazo dos cinco días seguintes á publicación da convocatoria, constituiranse as xuntas electorais integradas por tres representantes dos electores das cámaras e dúas persoas designadas pola Administración tutelante, unha das cales exercerá as funcións de presidente.

2. O presidente nomeará un secretario da xunta electoral con voz e sen voto necesariamente entre funcionarios da Administración tutelante. En calquera caso, a xunta electoral solicitará o asesoramento en dereito dun secretario das cámaras da demarcación.

3. O ámbito territorial das xuntas electorais será, ao menos, coincidente co da demarcación territorial da cámara afectada polo proceso electoral, e poderá ser superior a el mesmo, segundo determine a Administración tutelante.

4. Os representantes dos electores das cámaras na xunta electoral serán elixidos, mediante sorteo, entre unha relación de electores proposta polo comité executivo de cada cámara na forma que se determine no regulamento de réxime interior. O sorteo realizarase en acto público presidido por un representante da Administración tutelante o primeiro día hábil seguinte á publicación da convocatoria e no mesmo acto elixiranse dous suplentes por cada membro. En caso de presentar candidatura para ser membro do pleno, deberán renunciar a formar parte da xunta.

5. O mandato das xuntas electorais prolongarase até os quince días seguintes ao da celebración das eleccións, momento en que quedarán disoltas.

6. Corresponderán á xunta electoral as seguintes funcións:

- a) Dirixir e supervisar o proceso electoral, garantindo a súa obxectividade e transparencia.
- b) Resolver as queixas e reclamacións que se lle dirixan en materia de procedemento electoral.
- c) Aprobar os modelos de actas de constitución das mesas electorais, de escrutinio e de proclamación de electos.
- d) Cursar cantas instrucións considere pertinentes ás mesas electorais para o mellor desenvolvemento do proceso electoral.
- e) Unificar os criterios interpretativos que, sobre materia electoral, puidesen xurdir durante o proceso en cada unha das mesas.
- f) Cursar as instrucións necesarias para a toma de posesión dos membros electos e a constitución do novo pleno.
- g) Supervisar a actuación dos órganos de goberno da cámara en funcións en materia electoral. Poderá adoptar cantos acordos considere oportunos para garantir a obxectividade e a transparencia das decisións dos ditos órganos no proceso electoral.
- h) Facilitar o censo electoral do seu grupo e categoría aos candidatos proclamados, así como a aquelas organizacións empresariais legalmente constituídas, naqueles grupos e categorías nos cales acrediten a proclamación de candidatos pertencentes á organización; sempre con pleno sometemento ao disposto na Lei orgánica 15/1999, do 13 de decembro, de protección de datos de carácter persoal.
- i) Verificar o resultado final das votacións e proceder á proclamación final dos candidatos electos.
- j) Exercer calquera outra función non atribuída á Administración de tutela ou aos órganos de cada cámara para os efectos de velar polo bo desenvolvemento do proceso electoral.

7. Contra os acordos das xuntas electorais poderase interpor recurso administrativo ante a Administración tutelante dentro do prazo do día hábil seguinte á notificación do acordo. A xunta electoral que ditase o acordo deberá remitir o expediente co seu informe nun prazo dun día hábil ao órgano competente para resolver, que deberá facelo no prazo improrrogable de cinco días hábiles contados desde a interposición do recurso. O recurso non suspenderá o proceso a non ser que a Administración tutelante considere que a súa resolución resulta fundamental para o desenvolvemento do proceso, evitando danos de difícil ou imposible reparación que deberán ser invocados polo recorrente.

Artigo 27. *Candidaturas e proclamación.*

1. As candidaturas deberanse presentar na secretaría da cámara respectiva durante os dez días seguintes á data de publicación no «Boletín Oficial» da provincia ou no «diario oficial da comunidade autónoma», segundo proceda, da convocatoria da elección. As candidaturas serán avaladas pola sinatura, como mínimo, do 5 por cento dos electores do grupo ou, se for o caso, da categoría correspondente. Se o número de electores do grupo ou categoría é superior a douscentos, será suficiente coa sinatura de dez electores para a presentación do candidato. A autenticidade da sinatura acreditarase mediante fedatario público ou ante o secretario da cámara. A presentación de cada aval poderase facer efectiva por calquera medio admitido en dereito que garanta a súa adecuada constitución e vixencia. Os defectos nos avais e nas candidaturas serán emendables nun prazo improrrogable de 5 días desde a notificación do defecto. A secretaría da cámara estenderá dilixencia en que fará constar o día e a hora da presentación de cada candidatura.

2. Finalizado o prazo de presentación de candidaturas e, de ser o caso, de emenda de defectos, a xunta electoral correspondente, despois de comprobar o cumprimento dos requisitos exixidos para a presentación das candidaturas, procederá á proclamación dos candidatos no prazo de cinco días contados desde a data en que finalizou o prazo de presentación ou, de ser o caso, de emenda.

3. Cando o número de candidatos que fosen proclamados por un grupo ou categoría resulte igual ao dos membros que se van elixir, a súa proclamación equivalerá á elección, e esta, por tanto, non se deberá efectuar.

Se non se chega a cubrir un número de vogalías como mínimo da metade máis un dos elixibles do pleno, conforme o procedemento electoral previsto neste real decreto, procederase á extinción da cámara. Neste caso, de acordo co previsto no artigo 37.4 da Lei 4/2014, do 1 de abril, e para aquelas cámaras cuxa tutela corresponda á Administración xeral do Estado, a Cámara Oficial de Comercio, Industria, Servizos e Navegación de España representará e prestará servizo ás persoas físicas ou xurídicas previstas no artigo 7.1 da dita lei que se encontren no territorio da cámara extinguida, sen que a dita cámara quede directa ou indirectamente vinculada polos saldos debedores derivados, dos cales responderá exclusivamente o patrimonio das cámaras extinguidas.

4. A xunta electoral reflectirá nunha acta a proclamación de candidatos e as incidencias que se producisen. Enviárase copia certificada desta á Administración tutelante antes de transcorridos tres días desde a proclamación de candidatos e, ademais, darase publicidade do seu contido mediante anuncio fixado no domicilio da cámara e publicado, ao menos, nun dos diarios de maior circulación da súa circunscrición e na súa páxina web.

Artigo 28. *Voto por correo.*

1. Os electores que prevexan que na data da votación non poderán exercer o seu dereito comparecendo no colexio electoral correspondente poderán emitir o seu voto por correo, logo de solicitude persoal á cámara, con suxeición aos seguintes requisitos:

a) Envío da solicitude. A solicitude, en modelos normalizados autorizados pola Administración tutelante e facilitados pola cámara respectiva, débese facer por escrito dentro dos dez días seguintes ao da publicación da convocatoria de eleccións e presentarse na secretaría da cámara ou remitirse por correo certificado e urgente. Na solicitude farase constar:

1.º No caso de persoas físicas, a identificación do elector xuntando unha fotocopia do documento nacional de identidade do asinante ou, de ser o caso, do pasaporte, permiso de conducir ou tarxeta de residente, que deberán estar compulsados de conformidade co establecido no artigo 31 do Regulamento polo que se regula a prestación dos servizos postais, en desenvolvemento do establecido na Lei 24/1998, do 13 de xullo, do servizo postal universal e de liberalización dos servizos postais, aprobado polo Real decreto 1829/1999, do 3 de decembro.

No caso de que as persoas físicas carezan da nacionalidade española, deberán acreditar a súa identidade a través do documento de identidade correspondente ou, no seu defecto, do pasaporte, e deberán, ademais, presentar a súa tarxeta de identidade de estranxeiro ou, no caso de nacionais dun Estado membro da Unión Europea, dun Estado parte no Acordo sobre o Espazo Económico Europeo ou dun Estado a cuxos nacionais se estenda o réxime comunitario de estranxeiría, o seu certificado de inscrición no Rexistro Central de Estranxeiros.

2.º No caso de persoas xurídicas, o domicilio social, os datos persoais do representante nos termos do número anterior e o cargo que desempeñe na sociedade ou a relación que o vincule con ela, o número de identificación fiscal da entidade e os documentos que acrediten a representación suficiente nos termos previstos no artigo 21.

3.º O grupo e, se for o caso, as categorías en que se desexa votar. Se non consta, entenderase solicitado o exercicio do voto por correo para todos os grupos ou categorías en que figure inscrito o empresario.

b) Comprobación de anotación no censo electoral do solicitante. A secretaría da cámara correspondente comprobará a inscrición no censo electoral, expedirá certificación acreditativa deste aspecto e, logo de anotación no censo para que non lle sexa admitido o voto persoal, remitirá ao petionario por correo certificado e urgente a documentación oportuna antes de dez días da data da elección.

A documentación será dirixida a nome do peticionario ao enderezo indicado para tal efecto ou, no seu defecto, ao que figure no censo.

Se non hai que celebrar elección no grupo correspondente, o solicitante deberá ser informado desta circunstancia.

A secretaría da cámara comunicará á xunta electoral a relación dos certificados solicitados e expedidos para o voto por correo.

c) Documentación que se enviará ao solicitante. A documentación -que deberá responder a modelos normalizados autorizados pola Administración tutelante- que se enviará ao solicitante por cada grupo ou categoría a que pertenza será:

1.º Sobre dirixido ao secretario da xunta electoral en que se indique o presidente da mesa electoral do colexio correspondente a quen deba ser entregado.

2.º Papeleta ou papeletas de votación por cada grupo en que teña dereito a voto.

3.º Sobre para introducir cada unha das papeletas, en cuxo anverso deberá constar o grupo e, se for o caso, a categoría.

4.º Certificación acreditativa da inscrición no censo.

5.º Candidatos proclamados no grupo ou categoría correspondente.

6.º Folla de instrucións.

d) Votación. O elector porá a papeleta de voto correspondente dentro do sobre en cuxo anverso figura o grupo e, se for o caso, a categoría. Unha vez cerrado, introducirá este primeiro sobre, xunto coa certificación de inscrición no censo, no segundo sobre, e remitirao por correo certificado e urxente á secretaría da xunta electoral respectiva para que o reciba antes das 20:00 horas do día anterior a que se celebren as eleccións.

Non se admitirán os votos por correo recibidos tras o referido termo.

Non obstante o previsto na letra b), o elector que obtivese certificado e documentación de voto por correo e desexe votar persoalmente, poderá facelo devolvendo á mesa electoral estes documentos. De non facelo así, non lle será recibido o voto.

2. O secretario da xunta electoral entregará os votos recibidos por correo aos presidentes das mesas correspondentes antes de finalizar as votacións.

Terminada a votación, o presidente da mesa procederá a introducir nas urnas os sobres que conteñan as papeletas de voto remitidas por correo, verificando antes a existencia da certificación que se debe xuntar a cada unha e que o elector está inscrito no censo. Seguidamente anotarase o nome destes electores na lista de votantes.

3. A Sociedad Estatal Correos y Telégrafos deberá desenvolver as funcións que lle corresponden como prestadora do servizo postal universal.

Poderanse establecer outros mecanismos de colaboración coa Sociedad Estatal Correos e Telégrafos no proceso, no marco dun convenio de colaboración que, para tal efecto, se subscriba co Ministerio de Economía e Competitividade e ao cal se poderán adherir as cámaras e as administracións tutelantes.

Artigo 29. *Voto electrónico.*

1. Os electores poderán emitir igualmente o seu voto por medios electrónicos utilizando para tal efecto a sinatura electrónica avanzada baseada nun certificado recoñecido.

2. En todo caso, os procedementos para a emisión do voto deberán permitir a constancia dos aspectos que se deban acreditar para as outras modalidades de votación.

3. Mediante orde do ministro de Economía e Competitividade concretaranse as condicións para o exercicio do voto electrónico sen que poidan regularse cuestións relativas ao procedemento electoral.

Artigo 30. *Publicidade Institucional.*

As cámaras e a Administración tutelante poderán realizar publicidade institucional para incentivar a presentación de candidaturas e a participación dos electores durante todo o período electoral e até vinte e catro horas antes do día fixado para a elección.

Artigo 31. *Garantías do proceso.*

1. Cada mesa electoral estará formada por un presidente e dous vogais que teñan o seu domicilio na localidade onde se estableza o colexio electoral. Nos termos fixados pola Administración tutelante, as cámaras deberán procurar a constitución dun número de mesas e colexios suficientes e unha adecuada repartición territorial deles co fin de facilitar o exercicio do dereito ao voto por parte dos electores. Os presidentes e os vogais serán designados pola xunta electoral de entre os electores domiciliados na localidade do colexio, que non sexan candidatos, mediante sorteo. A xunta electoral designará, de igual modo, presidentes e vogais suplentes. O presidente da mesa poderá, así mesmo, solicitar a asistencia técnica dun empregado da cámara.

2. Todos os electores teñen dereito a acceder libremente aos locais electorais, a examinar o desenvolvemento das operacións de voto e de escrutinio e a formular reclamacións. Cada candidato poderá designar até dous interventores que fiscalicen a votación e o escrutinio.

3. Constituída a mesa dun colexio o día da elección, non se poderá comezar a votación sen terse estendido previamente a oportuna acta de constitución, da cal se redactará unha copia certificada asinada polo presidente e polos vogais para cada candidato que a pida. O horario electoral será ininterrompido o día da votación e en ningún caso se poderá abrir a mesa para votacións despois das 9:00 horas nin pechase antes das 21:00 horas.

4. No caso de que os membros designados da mesa non se encontren presentes no acto da constitución, asumirán as súas funcións un representante da Administración tutelante, que actuará como presidente, e un empregado da cámara, que actuará como vogal.

5. Unha vez comezada a votación non se poderá suspender, a non ser por causa de forza maior, e sempre baixo a responsabilidade da mesa do colexio respectivo.

6. En caso de suspensión, a mesa do colexio redactará a acta, que será entregada ao presidente da xunta electoral, quen o comunicará inmediatamente ao órgano competente da Administración tutelante co fin de que sinala a data en que se deberá realizar novamente a votación nesa mesa.

7. A votación será secreta. Os electores depositarán o seu voto na urna mediante papeleta dobrada e introducida nun sobre. Se nas papeletas figura un número de nomes superior ao das vacantes para cubrir en cada grupo ou categoría, considerarase como nulo o voto. Os vogais anotarán os electores que voten, con indicación do número con que figuren no censo da cámara.

8. No momento de exercer o seu dereito ao voto, o elector presentará os documentos que acrediten a súa personalidade e, se for o caso, a representación con que se vai exercer tal dereito.

9. O presidente da mesa ten dentro do local electoral autoridade para conservar a orde, asegurar a liberdade dos electores e manter a observancia da lei.

As forzas de policía destinadas, se for o caso, a protexer os colexios electorais prestarán ao presidente da mesa, dentro e fóra dos locais, o auxilio que este requira.

10. Só terán entrada nos colexios os electores, os candidatos e os seus apoderados ou interventores, os notarios que sexan requiridos para dar fe de calquera acto da elección no que non se opoña ao segredo desta e os axentes da autoridade que o presidente requira.

11. Transcorrido o período sinalado para a votación, a mesa procederá a realizar o escrutinio, que será público. Se só existe un colexio electoral, o escrutinio será definitivo. Estenderase a acta oportuna subscribida polos compoñentes da mesa, na cal figurará o número dos votos emitidos, persoalmente e por correo, o dos declarados nulos e en

branco, e os candidatos elixidos co número de votos correspondentes, así como os candidatos non elixidos cos votos obtidos e as reclamacións que se presentaron. Consideraranse elixidos, pola súa orde, o candidato ou candidatos que obtivesen maior número de votos e, en caso de empate, o de maior antigüidade no censo da cámara e, se esta for igual, o que satisfaga maior achega.

12. Se existen varios colexios electorais, cada mesa, finalizado o escrutinio, redactará a acta co resultado da elección na cal fará constar os votos emitidos, persoalmente e por correo, os anulados, en branco e o número de votos obtidos por cada candidato e as reclamacións que se presentaron.

13. As reclamacións deberanse formular no acto e por escrito ante as mesas electorais e serán resoltas por elas tamén no acto. Contra esta resolución poderase reclamar ante a xunta electoral no prazo de dous días, que resolverá en 24 horas e contra cuxa resolución poderán os interesados interpor recurso administrativo, no prazo de dous días, ante o órgano competente da Administración tutelante, que deberá resolver no prazo de 24 horas.

14. En ambos os casos, as actas serán remitidas á secretaría da cámara, onde quedarán depositadas. Estenderanse copias certificadas das actas para os candidatos que as soliciten.

15. Ao terceiro día de finalizadas as eleccións, a respectiva xunta electoral en acto público procederá a verificar o resultado final das votacións, segundo as actas correspondentes aos distintos colexios electorais. Redactarase a nova acta asinada polos membros da xunta, na cal se fará constar o número total de votos emitidos, os anulados, en branco, os votos obtidos por cada candidato e os candidatos declarados elixidos, así como as reclamacións que se presentasen no dito acto.

16. A secretaría da cámara entregará a cada un dos elixidos a credencial que xustifique a súa calidade de membro electo.

17. O expediente electoral arquivarase na cámara e del remitirase copia certificada ao órgano competente da Administración tutelante, dentro dos dez días seguintes á terminación das eleccións.

Artigo 32. *Órganos en funcións.*

1. Os órganos de goberno das cámaras continuarán no exercicio das súas funcións desde a data de convocatoria prevista no artigo 25.1 até a constitución dos novos plenos ou, se for o caso, até a designación do órgano de xestión previsto no artigo 37.2 da Lei 4/2014, do 1 de abril.

2. O exercicio en funcións abarca unicamente aquelas actividades de xestión, administración e representación indispensables para o funcionamento ordinario da cámara, de maneira que non se comprometa a actuación dos novos órganos de goberno electos.

3. En caso de que non se poida constituír validamente o novo pleno, a Administración tutelante designará un órgano de xestión para o funcionamento da cámara. Se no prazo de tres meses este órgano non logra a constitución do novo pleno polos procedementos establecidos neste capítulo, solicitará á Administración tutelante a convocatoria de novas eleccións, sen prexuízo da aplicación, se for o caso, do artigo 37.3 da Lei 4/2014, do 1 de abril.

Artigo 33. *Constitución dos órganos.*

1. Os membros electos do pleno tomarán posesión dos seus cargos ao inicio da sesión constitutiva, que terá lugar no prazo máximo de trinta días desde a celebración das eleccións, do cal se dará conta inmediata ao órgano competente da Administración tutelante. As persoas físicas farano persoalmente e as persoas xurídicas, por medio dun representante designado para tal efecto con poder suficiente. Para a válida constitución do pleno, incorporaranse os vogais representantes de empresas e persoas de recoñecido prestixio na vida económica dentro da circunscrición de cada cámara, designados polas organizacións empresariais intersectoriais e territoriais máis representativas conforme a

disposición adicional sexta do texto refundido da Lei do Estatuto dos traballadores, aprobado polo Real decreto legislativo 1/1995, do 24 de marzo, e os representantes das empresas de maior achega voluntaria en cada demarcación, elixidos todos eles na forma que determine a Administración tutelante, segundo o establecido nas letras b) e c) do artigo 10.2 da Lei 4/2014, do 1 de abril, que tamén tomarán posesión dos seus cargos ao inicio da sesión, do cal se dará conta inmediata ao órgano competente da Administración tutelante.

Neste caso, o procedemento para a designación dos vogais das letras b) e c) do artigo 10.2 da citada lei determinarase mediante orde do ministro de Economía e Competitividade.

2. Unha vez constituído o pleno, procederase por votación nominal e secreta á elección, de entre os seus membros, do presidente e dos demais membros do comité executivo. Para tal efecto, formarase a mesa electoral, que estará composta polos dous membros de maior e menor idade, respectivamente, do pleno da cámara, e polo representante da Administración tutelante, que se regula no artigo 4.4 deste real decreto, que actuará de presidente. Fará as funcións de secretario o que o sexa da cámara.

3. Unha vez aberta a sesión, iniciarase a quenda de proposta de candidatos sobre os cales deberá recaer a votación. Os candidatos resultarán electos por maioría simple. O candidato a presidente presentará unha única candidatura en que se inclúan a totalidade dos cargos e vogais do comité executivo. As candidaturas deberanse presentar e facerse públicas ao menos con 24 horas de antelación á realización de votacións.

4. A mesa electoral realizará o escrutinio e informará do resultado ao pleno, advertindo da posibilidade de manifestar calquera desconformidade co acto electoral. Inmediatamente, redactarase a correspondente acta, na cal se farán constar as incidencias do acto electoral, o resultado da votación e as reclamacións que se formulen e, seguidamente, remitirase unha copia certificada por mediación do presidente ao órgano competente da Administración tutelante, quen resolverá, con audiencia dos interesados, sobre as incidencias presentadas no prazo de 30 días naturais desde a súa recepción.

5. Unha vez resoltas as incidencias, se as houber, o órgano competente da Administración tutelante disporá a publicación no «Boletín Oficial» da provincia ou no «diario oficial da comunidade autónoma» dos nomeamentos do presidente, dos cargos do comité executivo e dos membros do pleno.

6. O presidente propondrá ao pleno as persoas de recoñecido prestixio da vida económica do ámbito territorial da demarcación da cámara que poderán asistir ás reunións deste, con voz pero sen voto, de acordo co artigo 10.3 da Lei 4/2014, do 1 de abril.

Artigo 34. *Provisión en caso de vacantes sobrevidas no pleno.*

1. As vacantes producidas pola perda da condición de membro do pleno por calquera das causas que se prevén no artigo 9 proveranse, no suposto previsto no artigo 10.2.a) da Lei 4/2014, do 1 de abril, mediante a súa substitución polo seguinte candidato máis votado dentro do seu grupo ou categoría. Se non hai outro candidato, as vacantes proveranse mediante elección no grupo ou categoría de que se trate.

Con este fin, a secretaría da cámara, no prazo dos dez días seguintes á declaración da vacante, comunicará por escrito esta circunstancia aos electores que corresponda ou, se o seu número excede os cen, mediante anuncio no «Boletín Oficial» da provincia ou no «diario oficial da comunidade autónoma», segundo proceda, e ao menos nun dos diarios de maior circulación na demarcación da cámara, co fin de que os que o desexen poidan presentar a candidatura de conformidade co que establece este capítulo, e darase conta á Administración tutelante.

As competencias propias da xunta electoral, nestes casos, serán asumidas polo comité executivo.

A persoa elixida ocupará o cargo polo tempo que falte para cumprir o mandato daquel a quen substitúa.

2. No caso dos vogais dos grupos b) e c) do artigo 10.2 da Lei 4/2014, do 1 de abril, a secretaría da cámara comunicará ás organizacións empresariais intersectoriais e

territoriais máis representativas, así como ás empresas de maior achega voluntaria en cada demarcación, esa circunstancia para que procedan á designación de novos vogais.

A persoa designada ocupará o cargo polo tempo que falte para cumprir o mandato daquel a quen substitúa.

Artigo 35. *Elección en caso de vacantes no comité executivo.*

1. Cando a vacante producida no pleno teña como consecuencia unha vacante no comité executivo, ou a da propia presidencia da cámara, procederáse a cubrir primeiro a vacante do pleno polo procedemento establecido no artigo 34.

2. Celebrada esta elección, proveráse a vacante do cargo de presidente ou do resto do comité executivo en sesión do pleno convocada para o efecto, polo procedemento establecido no artigo 33.

CAPÍTULO V

Extinción das cámaras

Artigo 36. *Extinción das cámaras.*

1. No caso en que se dean os supostos previstos no artigo 37 da Lei 4/2014, do 1 de abril, procederáse á extinción da cámara.

2. Considérase que se dan os supostos determinantes da extinción cando se produza calquera dos seguintes supostos e, ademais, non fose posible a celebración de eleccións e a constitución dos órganos de goberno da cámara:

a) Infraccións do ordenamento xurídico vixente que, pola súa gravidade ou reiteración, fagan aconsellable esta medida e non se puidesen emendar durante o período de suspensión a que se refire o artigo 37.2 da Lei 4/2014, do 1 de abril.

b) Imposibilidade de funcionamento normal dos órganos de goberno.

3. Nos supostos do artigo 37.2 e 3 da Lei 4/2014, do 1 de abril, o órgano de xestión estará composto por un representante da delegación do Goberno, un representante do Ministerio de Economía e Competitividade, un representante do Ministerio de Facenda e Administracións Públicas, un representante da Cámara Oficial de Comercio, Industria, Servizos e Navegación de España e un representante da cámara afectada.

Disposición adicional primeira. *Réxime de protocolo.*

O presidente da Cámara Oficial de Comercio, Industria, Servizos e Navegación de España, para os únicos efectos de definición da súa precedencia, será equiparado protocolariamente ás autoridades sinaladas no número 22 do artigo 10 e no número 25 do artigo 12 do Real decreto 2099/1983, do 4 de agosto, polo que se aproba o ordenamento xeral de precedencias no Estado.

Disposición adicional segunda. *Tutela en materia de comercio exterior.*

1. A tutela prevista nos artigos 33 e 34.2 da Lei 4/2014, do 1 de abril, básica das cámaras oficiais de comercio, industria, servizos e navegación, e da Cámara Oficial de Comercio, Industria, Servizos e Navegación de España no que se refire ás actividades relativas ao comercio exterior, correspóndelle á Secretaría de Estado de Comercio, que a exercerá a través da Dirección Xeral de Comercio Internacional e Investimentos en coordinación con Icxex, España, Exportación e Investimentos.

2. Para o efectivo exercicio desta tutela, as cámaras oficiais de comercio, industria, servizos e navegación e a Cámara Oficial de Comercio, Industria, Servizos e Navegación de España deberán comunicar á Administración de tutela as actividades de interese xeral relativas ao comercio exterior que acordasen os seus órganos de goberno. Mediante orde

do ministro de Economía e Competitividade regularanse o procedemento e os prazos para o exercicio da tutela prevista nos artigos 33 e 34.2 da Lei 4/2014, do 1 de abril.

En todo caso, a función de tutela en actividades que precisen a autorización da Administración tutelante suporá apreciar que adoptasen o correspondente acordo os órganos da cámara de conformidade coas maiorías exixidas, no estrito cumprimento das súas competencias e a súa incidencia no interese xeral do comercio exterior.

3. O plan cameral de internacionalización será aprobado pola Secretaría de Estado de Comercio, por proposta da Cámara Oficial de Comercio, Industria, Servizos e Navegación de España e logo de consulta coas comunidades autónomas. A execución do dito plan realizarase mediante convenio suscrito entre o Ministerio de Economía e Competitividade e a Cámara Oficial de Comercio, Industria e Navegación de España, e en colaboración coas cámaras oficiais de comercio, industria, servizos e navegación. Mediante orde do ministro de Economía e Competitividade fixaranse os termos para a subscripción do convenio. Tamén se regularán o procedemento, os prazos e o contido mínimo do resto de mecanismos de cooperación previstos no artigo 22 da Lei 4/2014, do 1 de abril.

Disposición transitoria única. *Designación de vogais do pleno.*

Para a designación das empresas de maior achega voluntaria teranse en conta as achegas realizadas desde a entrada en vigor da Lei 4/2014, do 1 de abril. No caso de que non se producisen achegas voluntarias e para o primeiro pleno que se constituía desde a entrada en vigor da Lei 4/2014, do 1 de abril, tomaranse en consideración as achegas obtidas do último recurso cameral permanente devindicado e aboadado.

Disposición derogatoria única. *Derogación normativa.*

Queda derogado o Decreto 1291/1974, do 2 de maio, polo que se aproba o Regulamento xeral das cámaras oficiais de comercio, industria e navegación de España.

Disposición derradeira primeira. *Título competencial.*

1. Os artigos 22.3 e 4 e 29.1 e 2 e a disposición adicional primeira teñen o carácter de lexislación básica sobre bases do réxime xurídico das administracións públicas de conformidade co artigo 149.1.18.^a da Constitución.

2. Os artigos 28.3 e 29.3 dítanse ao abeiro da competencia exclusiva do Estado para regular a materia de correos e telecomunicacións, prevista no artigo 149.1.21.^a da Constitución.

3. A disposición adicional segunda dítase ao abeiro do artigo 149.1.10.^a da Constitución sobre competencias exclusivas do Estado en materia de comercio exterior.

Disposición derradeira segunda. *Adaptación ao contido da norma.*

As cámaras oficiais de comercio, industria, servizos e navegación de Ceuta e Melilla adaptarán ao contido deste real decreto os seus actuais regulamentos de réxime interior no prazo de tres meses desde a súa entrada en vigor.

Disposición derradeira terceira. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 17 de xullo de 2015.

FELIPE R.

O ministro de Economía e Competitividade,
LUIS DE GUINDOS JURADO